

justificatus pacem ad Deum habere cœperit : secundum autem prædestinationem Dei , jam filius pacis erat. Neque enim dictum est, Super quem requieverit pax vestra, sicut filius pacis : sed, Si ibi fuerit, inquit, filius pacis, requiescat super illam donum¹ pax vestra. Jam ergo et antequam illi annuntiaretur hæc pax, filius pacis ibi erat, sicut eum noverat atque præscierat non evangelista, sed Deus. Ad nos ergo qui nescimus quisnam sit filius pacis, aut non sit, pertinet nullum exceptum facere, nullumque discernere; sed velle omnes salvos fieri, quibus prædicamus hanc pacem. Neque enim metuendum est ne perdamus eam, si ille cui prædicamus, non est filius pacis, ignorantibus nobis : ad nos enim revertetur, id est, nobis proderit ista prædicatio , non et illi ; si autem super eum pax prædicata requieverit, et nobis, et illi.

47. Quia ergo nos qui salvi futuri sint nescientes , omnes quibus prædicamus hanc pacem salvos fieri velle Deus jubet , et ipse in nobis hoc operatur , diffundendo istam charitatem in cordibus nostris per Spiritum sanctum qui datus est nobis (Rom. v, 5) : potest etiam sic intelligi , quod *omnes homines Deus vult salvos fieri*; quoniam nos facit velle : sicut misit Spiritum Filii sui clamantem, *Abba, Pater* (Galat. iv, 6), id est , nos clamare facientem. De ipso quippe Spiritu, alio loco dicit, *Accepimus Spiritum adoptionis filiorum, in quo clamamus, Abba, Pater* (Rom. viii, 15). Nos ergo clamamus , sed ille clamare dictus est , qui efficit ut clamemus. Si ergo clamantem Spiritum recte dixit Scriptura , a quo efficitur ut clamemus ; recte etiam volentem Deum a quo efficitur ut velimus. Ac per hoc, quia et corripiendo nihil aliud debemus agere , nisi ut ab ista pace quæ est ad Deum non recedatur, aut ad eam qui recesserat revertatur , nos agamus sine desperatione quod agimus. Si filius pacis est quem corripimus , requiescat super eum pax nostra : sin autem, ad nos revertetur.

48. Quamvis itaque etiam dum quorumdam fides subvertitur, firmum Dei fundamentum stet, quoniam scivit Dominus qui sunt ejus : non tamen ideo nos pigri et negligentes esse debemus in cerripiendis, qui corripiendi sunt. Neque enim frustra dictum est, *Corrumpunt mores bonos colloquia mala* (I Cor. xv, 33); et, *Peribit² infirmus in tua scientia, frater, pro-*

pter quem Christus mortuus est (I Cor. viii, 11). Non argumentemur contra ista præcepta salubremque terrorrem dicentes , Et corrumpant mores bonos colloquia mala; Et, pereat infirmus, quid ad nos ? Firmum fundatum Dei stat, et nemo perit nisi filius perditionis.

CAPUT XVI. — Absit ut ista garrientes , securos nos in hac negligentia esse debere credamus. Verum est enim quia nemo perit, nisi filius perditionis : sed ait Deus per Ezechielem prophetam, *Ille quidem in peccato suo morietur, sanguinem vero ejus de manu speculatoris requiram* (Ezech. iii, 18).

49. Proinde , quantum ad nos pertinet, qui prædestinatos a non prædestinatis discernere non valemus , et ob hoc omnes salvos fieri velle debemus ; omnibus, ne pereant, vel ne alias perdant, adhibenda est a nobis medicinaliter severa correptio : Dei est autem illis eam facere utilem , quæ ipse præscivit et prædestinavit conformes imaginis Filii sui. Si enim aliquando timore non corripimus, ne aliquis inde pereat; cur non etiam timore corripimus, ne aliquis inde plus pereat? Neque enim dilectionis viscera majora gestamus quam beatus Apostolus, qui dicit : *Corripite inquietos, consolamini pusillanimes, suscipite infirmos, patientes estote ad omnes : videte ne quis malum pro malo alicui reddat* (I Thess. v, 14, 15). Ubi intelligendum est tunc potius malum pro malo reddi , si corripiendus non corripitur , sed prava dissimulatione negligitur. Dicit etiam : *Peccantes coram omnibus corripe, ut cæteri timorem habeant* (I Tim. v, 20). Quod de his peccatis accipiendum est quæ non latent , ne contra Domini sententiam putetur locutus. Ille enim dicit : *Si peccaverit in te frater tuus, corripe eum inter te et ipsum*. Verumtamen et ipse severitatem correptionis eo usque perducit , ut dicat, *Si nec Ecclesiam audierit, sit tibi tanquam ethnicus et publicanus* (Matth. xviii, 15, 17). Et quis magis dilexit infirmos , quam ille qui pro omnibus est factus infirmus , et pro omnibus ex ipsa infirmitate crucifixus ? Quæ cum ita sint , nec gratia prohibet correptionem, nec correptio negat gratiam : et ideo sic est præcipienda justitia , ut a Deo gratia , qua id quod præcipitur fiat, fideli oratione poscatur ; et hoc utrumque ita faciendum est , ut neque justa correptio negligatur. Omnia vero hæc cum charitate fiant : quoniam charitas nec facit peccatum , et cooperit multitudinem peccatorum.

¹ Ita hoc loco MSS. At editi habent, *super eum*; et omitunt, *domum*.

² In MSS., *Perit.*

AD SUBSEQUENTES DUOS LIBROS, UNUM DE PRÆDESTINATIONE SANCTORUM, ALTERUM DE DONO PERSEVERANTIÆ, ADMONITIO PETITA EX LOVANIENSIO EDITIONE.

Postquam in Gallias allati fuere libri quidam Augustini contra Pelagianos scripti, non paucorum illic animos, offendebant; non modo de communi doctorum vulgo , sed quorumdam etiam presbyterorum ac episcoporum qui et pietate et eruditione celebres et commendati habebantur : adeo ut multi quoque Augustini doctrinæ

saventes, eorum auctoritatem reveriti, a meliore sententia revocarentur, aut eam certe prohiteri publice non auderent. Verum alii quidam cordatores firmioresque, inter quos præcipui Prosper et Hilarius (a), sentientes eos Pelagiani erroris vel incautos negotium agere, quosdam vero rem non intellectam imperite calumniari; fortiter se iis opposuere. Quibus cum per omnia satisfacere non possent, re ad Augustinum relata rogant ut quæ in ejus libris, præsertim de *Correptione et Gratia*, quosdam suorum offendebant, clarius disertiusque explicare dignaretur. Ea vero quæ sint, ex subjectis utriusque epistolis cognoscere licebit. Hac occasione scripsit Augustinus sequentes libros duos, alterum de *Prædestinatione Sanctorum*, alterum de *Dono Perseverantiae*. Sed adeo nec his quidem satisfactum hominibus illis fuit, ut Augustini doctrinam ac libros magis etiam magisque aversarentur, multa in eis imperite malitioseque calumniantes. Unde factum ut adversus eorum reprehensiones Prosper defuncto jam Augustino varios ediderit apologeticum libellos: cuius generis sunt præter alios, ad capitula Gallorum, ad objectiones Vincentianas, ad excerpta Genuensium, et adversus Collatorem responsiones. Quibus cum eorum inscitiam et calumnias clarissime coarguisset, ut erubescere jam merito etiam deberent, maiores tamen postea motus concitarunt, nec Prospero jam et Hilario parcentes: ut coacti fuerint ad Apostolicam Sedem confugere, quam eo tempore Cœlestinus pontifex gubernabat. Is rem totam ab eis edoctus ad Gallie episcopos quosdam litteras mittit, quibus Augustinum et doctrinam ejus tuctur ac prædicat, obrectatores ejus graviter coarguit, episcopis mandat ut eis silentium imponant. Sed ne sic quidem prorsus quievere. Quia enim pontifex libros eos quos illi tam odiose traducebant, videlicet de *Correptione et Gratia*, de *Prædestinatione Sanctorum*, de *Perseverantiae Dono*, nominatim non expresserat, titulis eos suis designans; post Cœlestini mortem aiebant non eos fuisse approbatos, nec propter illos commendatum auctorem, sed pro anteriorum scriptorum meritis laudationem istam in eum fuisse collatam: ut testis est propter illos Prosper sub finem libri contra Collatorem. Quocirca, tempore Felicis Papæ IV, celebratum fuit in Arausicam civitatem concilium (b), quod est ejus loci secundum, in quo renovata et iterato confirmata est catholica et apostolica, eademque Augustini de gratia et libero arbitrio doctrina, canonibus ipsis ex Augustini libris passim decrptis. Quæ omnia in Appendix, parte secunda, reperire licebit. Caeterum quod horum duorum librorum in Retractionibus suis non meminerit Augustinus, inde factum, quod cum hæc scriberet, iam duos Retractionum libros ediderat, quemadmodum ipsem infra testatur, libro primo et libro secundo.

His præsertim ex libris Augustini agnisci voluit Hormisdas Papa, quid Romana et Catholica Ecclesia de libero arbitrio et gratia Dei profiteatur. Cujus Pontificis auctoritate libros eosdem episcopi Africani pro fide in Sardinia exsules maxime commendant in Epistola synodica. *Præ omnibus, inquit, studium gerite, quos ad Prosperum et Hilarium scripsit, memoratis fratribus legendos ingerere. Quorum mentionem beatæ memoriae Hormisdas Sedis Apostolicæ gloriosus antistes in epistola, quam consulenti se sancto fratri consacerdotique nostro Possessori rescripsit, cum magno præconio catholicæ laudis inseruit; cujus hæc verba sunt: De arbitrio tamen libero et gratia Dei, quid Romana, hoc est catholica, sequatur et servet Ecclesia, licet in variis libri beati Augustini, et maxime ad Prosperum et Hilarium abunde possit agnosci, tamen et in scriniis ecclesiasticis expressa capitula continentur.*



EPISTOLA INTER AUGUSTINIANAS CCXXV (c).

Domino beatissimo papæ, ineffabiliter mirabili, incomparabiliter honorando, præstantissimo patrono
AUGUSTINO, PROSPER.

1. Ignotus quidem tibi facie, sed jam aliquatenus, si reminiscaris, animo ac sermone compertus; nam per sanctum fratrem meum Leontium diaconum misi epistolam¹ et recepi; nunc quoque Beatitudini tuae scribere audeo, non solum salutationis, ut tunc, studio; sed etiam fidei, qua Ecclesia vivit, affectu. Execubante enim pro universis membris corporis Christi vigilantissima industria tua, et adversus hæreticarum doctrinarum insidias veritatis virtute pugnante, nullo modo mihi verendum putavi ne onerosus tibi, aut importunus essem in eo quod ad multorum salutem, ac perinde ad pietatem tuam pertinet: cum potius reum futurum esse me crederem, si ea, quæ valde perniciosa esse intelligo, ad specialem patronum fidei non referrem.

2. Multi ergo servorum Christi (d) qui in Massiliensi urbe consistunt, in Sanctitatis tuae scriptis, quæ adversus Pelagianos hæreticos condidisti, contrarium putant patrum opinioni et ecclesiastico sensui, quidquid in eis vocatione electorum secundum Dei propositum disputasti. Et cum aliquandiu tarditatem suam culpare ma-

¹ Quatuor MSS., *epistolam*.

(a) Hilarium hunc Arelatensem appellant Lovanienses, sed falso. Vide annotationem ad Hilarii epistolam, infra col. 933-934.

(b) Hic rursum corrigendi Lovanienses, qui Arausicanum istud secundum concilium jussu Leonis Papæ I celebratum dicunt.

(c) Hæc ei istola mittitur a Prospero ad Augustinum de reliquis Pelagianæ hæreseos in Gallia sobolescentibus, deque hujusmodi hominum querelis adversus Prædestinationis et Gratiae doctrinam superioribus ipsius Augustini opusculis, præsertim libro de *Correptione et Gratia* explicatam.

(d) Id est, monachorum, quorum nominatissimus Joannes Cassianus collationum editor, ipsius Prospere contra Collatorem a libro postea confutatus.